

# Il cumponist che avra fenestras

Purtret dal pedagog da musica e dirigent Peter Appenzeller

■ (anr/abc) «Eu sa d'üna staila, l'im-mensa vastezza, ingiò cha tü chattast plaschair e tristezza...»: Uschia cumenza ina poesia dad Alfons Cläuna. Igl è in dals textader ch'il cumponist apprezzescha fitg. Ed il chantun Grischun apprezzescha sia lavur. Il november passà ha il musicist che è domicilià a Feldmeilen retschavi in premi da renconuschientscha. «Peter Appenzeller retschaiva il premi sco undraziun per sia lavur multifara sco dirigent, cumponist e pedagog da musica en Svizra ed a l'exteriur»: Quai ha il chantun communitgà en connex cun ils premis da renconuschientscha. Il musicist era en buna cumpagnia. En il medem mument ha la regenza grischuna onurà otg autras persunas. Tut glied che ha merits per la cultura, per il bun num da noss chantun, cun lavur creativa.

## «Jau sun in um fortunà»

El saja in musicist dotà cun in talent rar, vegni adina puspè ditg en ravugls da chors. Uschia valitavan ses chantadurs dal chor viril Ligia Grischa lur dirigent ch'el haja l'udita assoluta. L'um da statura satiglia e stendida, modest e pacific en ses cumportament, untgescha questa valitaziun: «Jau sun in uman fortunà, jau hai adina gi fortuna en mia vita.» In auter schess insatge auter. Cun 21 onns han el e sia dunna Constanza fundà famiglia. En quella vegliadetgna è el daventà per l'emprima giada bab, ed el era anc en il studi da musica. Dirigi aveva el gia avant. Ses emprim chor è stà il Chor viril Alpina ch'el aveva surpiglià bunamain sfurzadamain durant il seminari da magisters a Cuira.

L'um da l'annada 1955 ha cumenzà a crear e furmar tuns enturn l'onn 1976. Ch'el daventia musicist era cler, perquai è el era i a Turitg. E là en la metropola svizra è tut i in pau svelto. El haja fatg tut en ina giada, raquinta il cumponist: Fun-



Il cumponist Peter Appenzeller experimentescha cun tuns. En tut sia lavur emprova el dad avrir las ureglias per quels.

FOTO A. BEELI

dà famiglia, frequentà il conservatori, dirigi il «Johannes-Kirchenchor», frequentà la scola da cantor e la scolaziun per musica da baselgia, fatg il diplom sco pedagog da musica, sa perfecziunà, guda gnà raps. «Jau erel sut squitsch», di el en la retrospectiva. Senza deplorar ch'el haja mancà insatge. En fitg blers cas na vegni betg declarà d'ina fortuna, sch'ins vegn bab cun 21 onns. In curriculum relativtuna savens auter e maina savens en problems. Ed el di ch'el haja gi fortuna. Il cumponist Peter Appenzeller e sia dunna Constanza èn dapi 37 onns in pèr, e dapi tants onns è el collià ferm cun la scola Rudolf Steiner a Turitg. En quella haja el pudì instruir musica ad uffants da tut ils stgalims. Il pli fascinant saja da vesair il progress che quels fetschian.

El raquinta: «Jau hai pudì accompagnar 12 onns ils medems uffants, da l'emprima chanzun enfin tar il requiem

da Mozart hai jau pudì assister a lur svilup cun la musica.»

## Ses «corps» per far musica vocala

Il cumponist è in filantrop ed il tipic artist. El ha gugent umans e lavura gugent cun glied. Il «Freier Chor Zürich» e «Cantaurora» a Cuira èn ses corps musicals. Cun quels po el exprimer sia musicalitad, sia passiu da laschiar tunar, maschadar e far polifonia. Il chor da Turitg maina el dapi 24 onns. Sias cumposiziuns sa distinguan sco tipicas «Peter Appenzeller».

Era sch'il cumponist e sia dunna han bandunà cun 21 onns il Grischun èn els adina stads preschents e da chasa en quel. Per l'ina tras dunna Constanza che deriva da la famiglia Kõnz da l'Engiadina Bassa. El sez era creschì si a San Murezzan nua ch'el ha gi pauc contact cun il ru-

mantsch. Tras sia dunna è el creschì en quella cultura, e quai a moda perfecta. Rumantschs che han l'emprima giada contact cun el na pon betg savair ch'el discorra da chasa anora dialect da Turitg. En la stiva da sia chasa a Feldmeilen raquinta il cumponist liber da ses temp al seminari, co ch'els faschevan «stuccas» e co ch'el ha emprèndi a conuscher era la Surselva. Ils chors da quella regiun chantan sias ovras sch'els vulan laschiar tunar. Per quai è el conuschent enfin giu l'Italia. Ses chor «CoroCantus» sa cumpona da 25–30 persunas cun passiu per musica vocala. L'entschatta d'avrigl sa legra dals concerts a Milano. «Igl è ina lavur che ma dat fitg blera satisfacziun», di l'artist dal tun. Chantar ensemen saja far art e furmar vita cuminaivla per l'avegnir», manegia il filantrop. Ed ins survegn quaidas da tedlar ses tuns cun il chor talian.